

解脫道論

古籍

才十二

四百十七
背十二

50889



解脫道論卷第十二

阿羅漢優波底沙 梁言大光造

梁扶南三藏僧伽婆羅譯

分別諦品第十二之二

彼坐禪人如是現觀滅以由觀滅成畏陰因
亦畏陰生畏三有五趣七識住九衆生居成
畏彼如惡人捉刀可畏如毒蛇如火聚如是
以由觀滅成畏陰因畏陰生畏三有五趣七
識住九衆生居以無常現作意今畏想以安
隱今起無相以苦現作意成畏生以安隱今
起無生以無我現作意成畏相及生以安隱
今起無相及無生觀過患觀厭離軟隨相似

忍是其揔語言

今起智怖已竟

彼坐禪人以怖現修行今起智樂解脫智生
彼陰相是怖者樂解脫智起陰生爲怖者樂
解脫智起三有五趣七識住九衆生居此怖
者樂解脫智趣如火所圍鳥從彼樂解脫如
人爲賊所圍從彼樂解脫如是彼坐禪人陰
因陰生三有五趣七識住九衆生居此怖畏
者樂解脫智起以無常現作意畏因以苦現
作意畏生以無我現作意畏因及生樂解脫
智起於是凡夫人及學人於樂解脫智二種
引心或觀歡喜於是現觀於是成通達現觀
歡喜心成憂惱成修行障礙成通達難見思

惟行捨中隨相似忍此是揔語言

樂解脫
智已竟

彼坐禪人如是現修行樂解脫智從一切諸

行樂解脫樂泥洹諸行唯作一相欲今起解

脫門相似智起以三行得相似智以三行越

正聚於五陰無常現見得相似智五陰滅常

泥洹如是現見越正聚於五陰以苦現見得

相似智五陰滅樂泥洹現見越正聚於五陰

以無我現見得相似智五陰滅第一義泥洹

現見越正聚問云何以智現越正聚云何以

智已越正聚答以性除智現越正聚以道智

已越正聚問相似智者何義答相似者四念

處四正勤四如意足五根五力七覺分八正

道分以彼相似此謂相似智揔語言無怨見

利相似忍此是相似智揔語言

相似智已竟

相似智無間次第從一切諸行相起作泥洹

事生性除智問云何義名性答除凡夫法名

性除非凡夫法所除亦名性除性者是泥洹

復次種植泥洹者名性除如阿毗曇所說除

生名性除度無生亦名性除復除生因名性

除度無生無相名性除於泥洹是初引路從

外起轉慧此性除揔語言

性除智已竟

性智無間次第現知苦現斷集現作證滅現

修道生須隨洹道智及一切菩提法彼坐禪

人於此時以寂寂現見有邊無爲醍醐戒於

一刹那以一智非初非後分別四諦以知苦
分別以斷集分別以作滅證分別以修道分
別成分別如譬喻偈所說

如人捨此岸

以船度彼岸

於彼度諸物

乘船者除漏

如船度水非初非後於一刹那作四事捨此

岸除漏到彼岸度物如捨此岸如是智分別

苦如除漏如是分別斷集如度彼岸如是作

證分別滅如以船度物如是修道分別如燈

共生於一刹那不初不後作四事如小燈炷

除闇令油消令光明起如日共生非初非後

於一刹那作四事令現色除闇令滅寒令起

光明如令現色如是智分別苦如除闇如是
分別斷集如令滅寒如是作證分別滅如令
起光明如是修道分別如日如是聖智問如
實現見苦知苦斷集證滅修道此相云何若
不見苦四顛倒生今時如所說有邊無爲醒
醐戒以寂寂現見以一智非初非後分別四
諦此義云何答於生滅智是時未成見苦漏
及至如實見諸行過患從諸行相今起心於
無行成度是故如實見諸行過患從諸行相
以今起心於無行成度是處見苦漏到最後
故復說若如是以寂寂以性除智成分別諦
性除智者從行相起成度無行若性除智從

行相起成度於無行成度於泥洹唯著因是
其事以著事得定心若不得定不生奢摩他
毗婆舍那亦不得菩提法滿是故以性除智
成分別諦從彼性除智無間道智成生於此
時得於泥洹定心得定成起奢摩他毗婆舍
那成滿菩提分法是故唯以道智成分別諦
如人從燒城出脚踏門閭從城已出一脚是
時未名出如是性除智從彼行相起成度無
行是時未名度煩惱諸法未滿故如人從所
燒城兩脚已出是時名出燒城如是性除智
無間成生道智起是時名從煩惱城出諸法
滿故是故以性除智成分別諦分別諦者何

義答四聖諦於一刹那說和合名分別諦於此時道智和合依義諸根成平等不動義力義乘義菩提分因義道分令住義念處勝義正勤便義如意足實義諦不亂義奢摩他隨觀義毗婆舍那義不相離義雙義覆義戒清淨不亂義心性淨見義見清淨義脫義解脫通達義明捨義脫斷義滅智根義欲令起義作意平等義觸受滅出離義現前義定依義念真實義慧深勝義醍醐最後義泥洹最後平等義坐禪人如是現智如是現見斷三結所謂身見疑戒取及彼相應煩惱問云何身見答於此無聞凡夫見色爲我我有色色爲

我所於色我如是受想行識見識爲我我有
識識爲我所於識我此謂身見此身已斷彼
斷故六十二見亦斷爲身見所初六十二見
問云何疑荅或於苦或於集或於滅或於道
或於佛法僧或初邊或後邊或初後邊疑惑
於因緣所起法彼疑惑此謂疑彼亦斷問云
何戒盜荅戒盜二種渴愛及癡我以此戒以
此行以此苦行以此梵行我當上天我皆當
生一一天處此謂渴愛戒盜從此外沙門婆
羅門以戒以清淨以清淨戒行彼如是見此
謂癡戒盜彼亦斷問云何彼一處住煩惱荅
彼今住惡趣婬欲瞋恚癡此謂彼一處住煩

惱亦斷於此間爲須陀洹果作證成向未得
須陀洹住須陀洹向地或第八地或見地或
定從兩起轉慧此須陀洹道智揔語言須陀
洹無間次第第三結斷故作無爲事與道等法
無異方便起須陀洹果智果心或二或三生
無間彼次第度後分心從後分起觀道觀果
觀泥洹觀已斷煩惱觀餘煩惱此謂須陀洹
不退法定向菩提向未來果欲分別是世尊
曾生口生法生法所造得法分不與物分此
謂見具足善修行通達聖法至醍醐門住見
具足到此妙法見此妙法已覺智成就已覺
明成就入法流聖通達慧開醍醐門住是故

說此偈

於地一國王

於天堂一王

領一切世間

須陀洹果勝

彼坐禪人於此地住於上作精進爲作斯陀
含果證作見生滅所初現觀如初所說現修
行如已見道依諸根力菩提覺如是分別諦
彼如是修行向滅斷塵欲瞋恚及彼一處任
煩惱從彼道無間作證斯陀含果彼坐禪人
於此地住於上作精進爲作阿那含果證作
見生滅爲初現見如初所說現修行如見道
依諸根力菩提覺如是分別諦彼如是向滅
斷細欲瞋恚及彼一處任煩惱從彼道無間

作證阿那含果彼坐禪人於此地住於上作
精進爲作證阿羅漢果作見生滅爲初現見
如初所說現修行如已見道依諸根力菩提
覺如是分別諦彼如是向斷色欲無色欲慢
調無明餘煩惱無餘斷從彼坐禪人作證阿
羅漢果彼觀道觀果泥洹觀斷煩惱彼比丘
成阿羅漢滅漏所作以立置擔到妙義斷有
結正智解脫離五分六分成就一字護不爲
死所繫除餘諦等滅信覓無濁思惟猗身行
善解脫心善解脫慧梵行已立成丈夫最勝
丈夫得第一所得此謂除瞋恚者度岸者離
煩惱者無結礙者得聖翻者除擔者不相應

者沙門者婆羅門者已俗者度韋陀者最上
婆羅門者阿羅漢者度者脫者伏者寂寂者
令寂者是阿羅漢摠語言於是若須陀洹從
其生於上不更作精進以三種得見三種須
陀洹一七生家家須陀洹一生須陀洹於是
鈍根成七生中根成家家利根成一生七生
者七時往天當來此作苦邊家家須陀洹或
二時或三時往彼家已往作苦邊一生須陀
洹已令生人有作苦邊若斯陀舍人從其生
於上不作精進一時來此世作苦邊若阿那
含從其生於上不作精進從此終生淨居彼
由諸根勝以五種得見成五阿那含中間般

涅槃生般涅槃不行般涅槃行般涅槃上流
往阿迦尼吒天於是名中間般涅槃者未至
所著無間中間依壽命時爲除殘結使令起
聖道生般涅槃者越中壽命爲除殘結使已
生令起聖道不行般涅槃者無異行爲除殘
結使令起聖道行般涅槃者有異行爲除殘結
使令起聖道上流阿迦尼吒天從不煩終往
不熱從不熱終往善見從善見終往善現從
善現終生阿迦尼吒天於阿迦尼吒爲除殘
結使起聖道於是不煩天万劫壽命不熱天
二万劫壽命善見天四万劫壽命善現天八
万劫壽命阿迦尼吒天十六万劫壽命於四

地成五五人於阿迦尼吒四人無上流人如是彼成二十四人阿羅漢已斷一切煩惱無餘故不成後有因因無故阿羅漢已免壽形命行滅此苦斷不起餘苦此謂苦邊是故說此偈

譬如槌打鐵

火星流入水

次第成寂滅

彼趣不可知

如是正解脫

已度欲縛漏

至於無動樂

彼趣不可知

問於此有師說次第修道次第斷煩惱次第分別諦答或以十一或以八或以四道智作證果問云何於此見不相應答若次第修行次第斷煩惱是故次第作證以是次第作證

果可樂與道果相應故若如是可樂一須隨
洹果者成耶若如是不可樂次第修道次第
斷煩惱者亦然復次第二過若以見苦見苦
所斷煩惱滅斷可樂是故已見苦見苦所斷
煩惱已斷作證四分須隨洹果作證應可樂
方便成就故若如是可樂作證四分須隨洹
四分七時生四分家家生四分一生四分住
於道四分住於果於此不相應若如是不可
樂以見苦見苦所斷煩惱斷耶此不相應復
次第三過若以見苦見苦所斷煩惱斷者所
樂是以現見苦四分須隨洹道住四分信行
四分法行成應可樂不見餘三諦若此所樂

住於四須陀洹道成四信行成四法行於此
不相應若如是不可樂以見苦見苦所斷煩
惱斷復次第四過亦不相應若現見道成向
以見道成住果此可樂以是現見苦成向以
見故成住果應可樂見一種故若如是可樂
向及住果成多過於此此不相應若如是不
可樂現見道成證以見道成住於果此亦不
相應復次第五過若以見道作證果未見苦
集滅成作證果可樂者以見苦集苦滅是無
義復次第六過若以十二或以八或以四道
智作證須陀洹果可樂者以是作證或十二
或八或四須陀洹果應成可樂者成道智無

果若如是可過地以成過於此此不相應若如是可樂或以十二或以八或以四道智作證須陁洹果者耶此亦不相應復此第七過若或十二若八若四道智今起一須陁洹果者可樂此亦不相應多事今起一果如多菴婆果今生一果問若以一智一刹那無前無後成分別四諦一智應成四見取事若以見苦成見四諦四諦成苦諦若此二義無此不相應一刹那以一智無前無後成分別四諦若非一智成四見取事亦非四諦成苦諦坐禪人唯從初四諦種種相一相以前分別前故今時以聖行苦諦如是相以適達成通達四諦

如其相四諦以如義成一相如五陰種種相
一相以前分別爲色陰以無常已見五陰無
常亦常見無常非色陰爲五陰如是入界如
是於此可知於是散法可知如是觀覺喜受
地根解脫煩惱正受二定於是觀者二觀禪
觀燥觀問云何禪觀已得定以定力伏蓋以
名比分別色觀見禪分奢摩他爲初修毗婆
舍那燥觀者以分別力伏蓋以色比分別名
見觀諸行毗婆舍那爲初修行奢摩他覺者
燥觀初禪及觀者觀道及果成有覺於三禪
毗婆舍那乃至性除成有覺道及果成無覺
於覺地道成八分道於無覺地七分除思惟

喜者燥觀得苦行具足毗婆舍那相似智成
無苦起性除道及果共起喜燥觀得樂行具
足於二禪毗婆舍那及道果共起喜於第三
禪於第四禪毗婆舍那道及果不共起喜於
喜地道及果七覺分起於無喜地六菩提覺
除喜菩提覺受者燥觀得苦行具足毗婆舍
那乃至相似智共捨起性除道及果共喜起
燥觀得樂行具足於三禪毗婆舍那道果共
喜起於第四禪毗婆舍那道果共捨起地者
二地見地思惟地於是須陀洹道見地餘三
道四沙門果思惟地未常見今見名見地如
是見如是修是思惟地復次二地覺地不覺

地於是四道道三沙門果覺地阿羅漢果無覺
地根者三出世間根未知我當知根已知根
知已根於是須陀洹道智初未知今知者成
未知智三道智三果智已知法更知知根阿
羅漢果智無餘已知法知者已知知根解脫
者三解脫無相解脫無作解脫空解脫於
是道相似智不作相是無相解脫不作願是
無作解脫不作執是空解脫復次此三解脫
以觀見成於種種道以得成於一道問云何
以觀見成於種種道答已觀見無常成解脫
無相以觀見苦成無作解脫以觀見無我成
空解脫問云何以觀見無常成無相解脫答

以無常現作意以滅諸行起心成多解脫得
信根及四根彼種類如實智相彼種類一切
諸行成無常起今起相怖畏從相行生智從
相心起於無相心越以無相解脫身得脫如
是以觀無常成無相解脫問云何以觀見苦
成無作解脫答以苦現作意以怖畏諸行今
起心成心多寂寂得定根及四根彼種類如實
知生以彼種類一切諸行成苦所見以怖畏
生今起生智從生起於無生心越以無作
解脫身得脫如是以觀見苦成無作解脫問
云何以觀見無我成空解脫答以無我現作
意以空今起諸行心成多厭惡得慧根及四

根彼種類如實知相及生以彼種類一切諸
法成無我可見以怖畏今起相及生依相及
生智唯起從相及生心成離於無相無生滅
泥洹心起以空解脫身得脫如是以觀見無
我成空解脫如是此三解脫以觀成於種種
道問云何以得三解脫成於一道荅已得無
相解脫成得三解脫何故是人以無相其心
得脫雖解脫彼已作以執其已得無作解脫
三解脫成所得何故以作其心得脫以解脫
彼以相以執得空解脫三解脫亦得何故若
其以執心得脫以解脫以相以作如是已得
三解脫成於一道解脫者解脫門者何差別

答唯彼道智從煩惱脫名解脫以入醍醐門
義名解脫門復次解脫者唯道智彼事爲泥
洹此謂解脫門煩惱者一百三十四煩惱如
是三不善根三覓四漏四結四流四軛四取
四惡趣行五慳五蓋六諍根七使世間八法
九慢十煩惱處十不善業道十結十邪邊十
二顛倒十二不善心起於是三不善根者貪
瞋癡於此三瞋者以二道成薄以阿那含無
餘滅貪癡者以三道成薄以阿羅漢道無餘
滅三覓者欲覓有覓梵行覓於此三中梵行
覓者以須陀洹道無餘滅欲覓者以阿那含
道滅有覓者以阿羅漢道滅四漏者欲漏有

漏見漏無明漏於此見漏者以須陀洹道滅
欲漏者以阿那含道滅有漏無明漏者以阿
羅漢道滅四結者貪欲身結瞋恚身結戒盜
身結此諦執身結於此戒盜身結者此諦執
身結以須陀洹道滅瞋恚身結以阿那含道
滅貪身結以阿羅漢道滅四流者欲流有流
見流無明流四軛者欲軛有軛見軛無明軛
如初所說滅四取者欲取見取戒取我語取
於此三取以須陀洹道滅欲取以阿羅漢道
滅四惡趣行欲惡趣行瞋惡趣行怖畏惡趣
行癡惡趣行此四以須陀洹道滅五慳者住
處慳家慳利養慳色慳法慳此五以阿那含

道滅五蓋者欲欲瞋恚懈怠睡眠調慢疑於
此疑者以須陀洹道滅欲欲瞋恚慢以阿那
含道滅懈怠調以阿羅漢道滅睡眠隨色六
諍根者忿覆嫉諂惡樂見觸於此諂惡樂見
觸以須陀洹道滅忿覆嫉以阿那含道滅七
使者欲染使瞋恚使慢使見使疑使有欲使
無明使於此見使疑使以須陀洹道滅欲染
使瞋恚使以阿那含道滅慢使有使無明使
以阿羅漢道滅世間八世法者利衰毀譽稱
譏苦樂於此四不受處瞋恚以阿那含道滅
於四愛處使以阿羅漢道滅九慢者從彼勝
我勝生慢與勝我等生慢從勝我下生慢從

等我勝生慢從等我等生慢從等我下生慢
從下我勝生慢從下我等生慢從下我下生
慢九慢者以阿羅漢道滅十惱處者貪瞋癡
慢見疑懈怠調無慙無愧於此見疑以須陀
洹道滅瞋恚以阿那含道滅餘七以阿羅漢
道滅十惱處者此人於我已作現作當作非
義生惱我所愛念人彼人已作現作當作其
非義生惱我所不愛念人彼人已作現作當
作者於非處生念九惱處以阿那含道滅十
不善業道者殺生不與取邪行妄語惡口兩
舌綺語貪瞋邪見於此殺生不與取邪行妄
語邪見以須陀洹道滅惡口兩舌瞋以阿那

含道滅綺語貪以阿羅漢道滅十使者欲染
使瞋恚使慢使見使疑使戒取使有染使嫉
使慳使無明使於此見疑戒取使以須陀洹
道滅欲染瞋恚嫉慳使以阿那含道滅慢有染
無明使以阿羅漢道滅十邪邊者邪見邪思
惟邪語邪業邪命邪精進邪念邪定邪智邪
解脫於此邪見邪語妄語業邪命邪智邪解
脫以須陀洹道滅邪思惟邪語惡語兩舌以
阿那含道滅邪語綺語邪精進邪念邪定以
阿羅漢道滅十二顛倒者於無常常想顛倒
心顛倒見顛倒如是於苦樂於不淨淨於無
我我於此無常常三顛倒於無我我者三顛

倒於不淨淨者見顛倒於苦樂者見顛倒以
須陀洹道滅於不淨淨者想顛倒心顛倒以
阿那含道滅於苦樂者想顛倒心顛倒以阿
羅漢道滅十二不善心起者與喜共起見相
應無行心起有行心起與喜共起見不相應
無行心起有行心起與捨共起見相應無行
心起有行心起與捨共起見不相應無行心
起有行心起與憂共起瞋恚相應無行心起
有行心起與調共起心起與疑共起心起於
此四見相應心起與疑共起心起以須陀洹
道滅二有共起心起以二道成薄以阿那含
道無餘滅四見心不相應起及調共起心起

以三道成薄以阿羅漢道無餘滅二正受者
二正受不與凡夫共及果成就想受滅正受
問云何果正受何故名果正受誰修誰令起
何故修云何修云何作意彼成就幾緣幾緣
住幾緣爲起此正受世間耶出世間耶荅云
何果正受者此沙門果心於泥洹安此謂果
正受何故果正受者非善非不善非事出世
道果報所成是故此果正受阿羅漢及阿那
含於此定作滿復有說一切聖人得令起如
毗曇所說爲得須陀洹道除生名性除爲須
陀洹果正受除生名性除如是一切復說一
切聖人成就餘於此定作滿唯彼令起如長

老那羅陀說諸比丘如是長老於山林井於
彼無繩取水。今時人來爲日所曝熱乏渴愛
彼人見井知有水。彼不以身觸住。如是我長
老有滅爲泥洹。如實正智善見我非阿羅漢
漏盡。何故令起者。答爲現見法樂住。今起如
世尊教阿難。是時阿難如來不作意一切諸
相。唯一受滅。無相心定。今起住。是時阿難如
來身成安隱。云何以今起者。答彼坐禪人入
寂寂住。或住或卧。樂得果正受。作生滅見所
初觀諸行。乃至性除智性除智。無間於泥洹
果正受。今安依其禪成修道。是是禪成所作
是名果正受。云何作意者。答無爲醍醐界以

寂作意彼成就幾緣幾緣爲住幾緣爲起答
彼正受二緣不作意一切諸相於無相界作
意三緣爲住不作意一切諸相於無相界作
意及初行二緣爲起作意一切相及無相界
不作意云何此定世間出世間耶答此出世
正受非世間正受問阿那含人爲果定現觀
何故性除無隔阿羅漢道不生答非樂處故
不生觀見無力故於是二種勝果可知成有
道及性除果現作證道無間果現成無道及
性除果成入果定成無道及性除果從滅定
起成無性除果

果正受
已竟

問云何想受滅正受誰令起幾力成就今起

幾行所除今起幾初事何義爲起云何起云
何從彼起云何心以起以起心何所著幾觸
所觸云何初起諸行死人及入滅想受定何
差別此定有爲無爲答不生心心數法此謂
滅想受定誰今起定者答云阿羅漢及阿那
含於此定作滿誰不令起者答凡夫人及須
陀洹斯陀含及生無色界人於是非其境界
故凡夫不能起煩惱障礙定未斷故須陀洹
斯陀含不能起爲更起非其處故入無色界
不能起幾力成就今起者答以二力成就今
起以奢摩他力以毗婆舍那力於是以奢摩
他力者由八定得自在以毗婆舍那力者由

自在隨七觀云何七隨觀無常觀苦觀無我
觀厭患觀無染觀滅觀出離觀奢摩他力爲
滅禪分及爲不動解脫毗婆舍那力爲見生
過患及爲無生解脫幾行所除今起定答以
除三行今起定口行身行心行於是入二禪
覺觀口行成所除入第四禪出息入息身行
成所除入滅想受定人想受心行成所除初
幾事者答初四事一縛不亂遠分別觀事非
事於是名一縛者鉢袈裟一處襍受持不亂
者以所有方便此身願莫生亂受持遠分別
者稱其身力以日作分別受持於此久遠過
我期常起觀事非事者未至時分別或衆僧

爲事非事和合以彼聲我當起受持於是一
縛者爲守護袈裟不亂者及久遠分別爲守
護身觀事非事者爲不妨衆僧和合住無所
有處或初作事入初禪何故令起答爲現法
樂住者是聖人最後無動定復爲起禪通入
廣定如長老正命羅漢爲守護身如長老舍
利弗如長老白鷺子底沙云何令起者彼坐
禪人入寂寂住或坐或卧樂滅意樂滅入初
禪入已安詳出無間見彼禪無常苦無我乃
至行捨智如第二禪第三禪第四禪虛空處
識處無所有處入已安詳出無間見正定無
常苦無我乃至行捨智

衆時無間入非非想處從彼或二或三今起
非非想心起已令心滅心滅已不生不現入
此謂入滅想受定

云何從彼起者彼非如是作意我當起已至
於初時所作分別成

云何心以起者若阿那含人以阿那含果心
起若阿羅漢人以阿羅漢心起起已彼心何
所著

答心專緣寂寂幾觸所觸者答三觸所觸以
空觸無相觸無作觸云何初起諸行從彼身
行從彼口行死人及入滅想定人何差別者
死人三行沒無現壽命斷煖斷諸根斷入受

想定人三行斷沒壽命不斷煖不斷諸根不
異此彼差別云何此定有爲無爲者答不可
說此定有爲無爲問何故此定不可說有爲
無爲

答有爲法於此定無有無爲法入出不可知
是故不可說此定有爲無爲已
咸禪定

解脫分別諦卅二品已竟

於此品數因緣戒頭陀定求善友分別行行
處行門五神通分別慧五方便分別諦此上
二品是解脫道品次第

無邊無稱不可思
於此法中誰能知

無量善才善語言
唯坐禪人能受持

微妙勝道為善行

於教不惑離無明

解脫道論卷第十二

背

跨跨

上苦

化反

吒

天

上竹

嫁反

誤

搥

打

上直

爆

報

蒲

法反

又

蒲

撲

反房

福



